

April. 2001
Volume 37, Number 04

Khristian Thukizakna



"Khrist misi laka kipan kaihthohin a om taktak ahi,
ihmute laka kipan gahmasa ana hita hi"
(1Kor. 15:20)

Editor: Rev L Kham Kho Lun

Contents

**Khristian
Thukizakna**

Vol 37
No 04
April.
2001

<ol style="list-style-type: none">1. Editorial2. Jesu Vualzou a Jerusalem a lutna3. Remember Me4. Jesu Khrist a dawnna ahi5. Hun nanung a thiltung ding genkhohlna leh a tangtun dan6. Kihoupihna sikgui buai ngeilou7. MTV Generation & Pathian Thutak kingakna8. Lamka Christopher Sun Crusade 20019. Dotna & Dawnna10. Kipahthu genna leh thumna makai11. Naupang Tohlet	<p style="text-align: center;"><u>Editorial Board</u></p> <p style="text-align: center;"><u>Editor</u> Rev. L. Kham Kho Lun</p> <p style="text-align: center;"><u>Managing Editor</u> Rev. (Dr) Luaichinhang</p> <p style="text-align: center;"><u>Circulation</u> Mr. Ngulkhanjam Ngaihte</p> <p style="text-align: center;"><u>Production Managers</u> Rev. V. Pumkam Upa L. Vungzamuam</p> <p style="text-align: center;"><u>Contributing Editors</u> Rev. S. Langzakhm Rev. M. Kamkhanhang Rev. N. Vungzasin Rev. V. Jamkhanhang Pastor M. Chinkhotuan</p>	
<p><u>Lakman :</u></p> <p>Kumkhat : Rs. 30.00 Bukhat : Rs. 3.00 Gamdang : \$ 5.00</p>	<p><u>Thusuah ding piakna :</u></p> <p>Editor : Khristian Thukizakna Dorcas Hall P.O. Box- 6, New Lamka 795128, Manipur, India.</p>	<p>Thusuah sunga kigente Evangelical Baptist Convention Saptuam ngaihndan ahi kim khol kei. Thusuahte in amau thusuah ah moh a pawtek ding uh.</p>
<p style="text-align: center;">Email: ebc@caltiger.com Phone & Fax : + 91 3874 - 33340</p> <p style="text-align: center;">No of Copies : 4,300 EBC Website: http://dorcashall.tripod.com</p>		

Editorial —

Sihna apan vualzou a thounawn I hondampa min manpha in simtute tengteng chibai kon buk masa hi !

Saptuamin ni poimoh tuam tuam ineihte laka I Toupa Jesu Khrist leitunga om lai a Pahtawi a omna, ei mikhialte tan dia hong sihna leh vualzou a a thawhnawwnna ni tukha a izatna dingah mimal chiat anuai a thute apann kivel thak le i chi hi. Jesu Khrist leitunga hongpai laiin, "Mite'n Mihing Tapa kua ahi achi ua" chiin na dong hi. Tuabang mahin eite'n zong mi'n bangchin hong mu uh hiam? chih ei leh ei kisut zel poimoh hi. Ahangbel, mi hong ngaihsut dan ding sutkhalou a mahni hoih hun kisak khak baihlam mahmah hi. Toupa hunlai in zong tuabang ana tam hikha ding hi (Lk 18:9). I mihinpihte tawh kiteh a hoih hun ina kisak laiin Toupa'n bang hong chi muh diam? chih ngaihsut huai hi.

Thukhun Lui hun a Kamsang thupite laka khat Elisha hihna, tua hun a mite muhdan thupi kasa mahmah hi. Amah kimuhdan hilou in mite'n a muhdan uh Laisiangthou in a gente ngaihsut tham ching sa in tutungin sutkhawm le'ng i chi hi.

Khatna ah: Jeriko khua a Kamsangte tapate'n amah amuh uleh, Elija kha Elisha tungah atu mah ve" a chi uhi (2Kum 2:15). Kamsang tapate pawlam kilatdan a baihlamtak a khemzawh ding mi hilou uhi. Ahinhangin, amaute'n Elisha tungah Elija kha tu (om) ahi chih muthei uhi. Eite mi'n hong et chiangin bang amu ding ua? Pathian Kha Siangthou omna mite bangin hong muthei ding uam? Ahihkeileh, thutaklou, kisathei, kikhamisak, gensiat hat, leibat ngaihsaklou, huaiham, zawl'ngaihhat leh adangdang in hong mu maimah ding uam? Kivel pha thak ni.

Nihna ah: Israel Kumpipa sila khat in, Elija khut tui a buak zelpa Saphat tapa Elisha hiai ah om eive" a chi hi (2 Kum. 3:11). Tulai hun mite kipulakna leh maitanglah dan tawh kikalh mahmah hi. Atom a genin "Elija sila leh nasempa ahi" chihna ahi. Tulai hun anezawte thupai hun, letzawh hun ahi diam aw chih in om hi.

Nasepna mun khenkhat ah aneute kihoutheihpihte thupai zaw abat ton uh om kichi sek hi. Mi tampite' tunga mite sanga pilzaw, siamzaw a kingai a, kuamah panpih kul kisa lou om nak hi. Ahihhangin, Laisiangthou in bel, "Pathianin mi kisatheite a dou a, kingaineute bel hehpihna a penak.....Toupa mitmuhin kingaineu un, huchiin a hon hihlian ding hi" ana chi hi (Jak. 4:6,10). "Khuta tui buak zelpa" chih a om i ut diam?

Thumna ah: Kumpipa Jehosaphat in Elisha "A kiangah Toupa thu a om hi" chiin na gen hi (2 Kum. 3:11). Elisha kianga "Toupa thu om" bang chitheih hi ding hiam chih ngaihsut tham ahi. Elisha thugen nopte Toupa thu hipelmawh ding hong chisak hi. Laisiangthou sinsakmi, a sin mi hinapi, a kam apan Toupa thu pawt lou a thu hoihlou, midangte demnate bang pawtsak khak theih ahi. Tuabang hileh eia Toupa thu omkhalou ahih ding lauhuai isa hi. Midangte tawh kithuah hunin bang thu igen tam pen a chihte kisut thak chiat ni. Ei a om, i lungtang sunga omte mah kigen kha nak hi. Sawltaklian Paul in, "Khrist thu tuh a hauhna tengteng tawh noumau ah omsak kikeih un" na chi hi (Kol. 3:16). Nang ah bang a om in na thei a, unau na ki enpha thak in.

Lina ah: Elisha tawh kisai gen in Shunam numei neizou nu'n, "Pathian mi siangthou ahi" chiin na gen leuleu hi (2 Kum. 4:9). Elisha tua lampi tawna a pai peuh mah chiangin amau inn ah an ne pahpah hihtuak hi. Hih thugennu in khat vei kia a muh zual hilou in, tamveipi amuh ahi. Limtakpia a etzui a a etsim sim nungin "Pathian mi siangthou" ahi chitheih hi. Pathian misiayangthou i hih leh hihlauh i kitheihnop leh i lungsim ngaihsutnate kisut kul hi. I thugennop, i lasak nop, i muhnop, i hawh nopnate, kivakna dinga i nekzonnate, i summuh dan, i kama thugen leh i lungsunga ngaihsut a kibang hiam chihte etchet kul ding hi. Sum muh leh zatna thu ah, numei leh pasal kikal thu ah, nek leh dawn thu ah kivel chian ni. Tuateng i kivelchet nunga "Mi siangthou ka hi" kichitheih ding in Toupa'n hon huh hen!

Toupa'n, "Pianken lui, nidanglai hindan segawpsa suahkhia a lungsim leh khaa a thak a om a, pianken thak, diktatna leh siangthouna Pathian batpiha siampen silh" dingin hong deih hi. Nang mite'n bang chi bang in hong mu a?

JESU VUALZOU A JERUSALEMA A LUTNA

B Vungzathang
Bungmual

Atunga thupi i taklat utoh kizuia i zat sek uh, PALM SUNDAY kichi, tukum 2000 adinga zang zouta i hi phot peuhmah uhi. Mi khenkhat lungsim ah, kholak fanga 'Hossanna' chi-a kikou khak louh mana, Palm sunday zang khalou kisakna a om kha zenzen moh kei ding. Khenkhat lah, zingsang baih taka thoua kholai fanga, "Hossanna! Toupa mina hongpai a hampaha! Gam hongtung ding i Pa David gam a hampaha! Tungnung pen ah, Hossanna!" chi-a awheu zena pang pawl i om dinga, Palm Sunday thupitaka zang kisakna a om khamawh kei ding. Mi kimkhat inlah, Laisiangthou sunga Palm Sunday kigenkha lou ahi, chi-a pang kenkan pawl a om kha ding Laisiangthou sungah "Palm Sunday" kichi thumal chitchiat tuang kha kei mahleh, Jesu vualzoua Jerusalema a lutna thu, Tanchin Hoih lite ah i mu thei tham uhi. Tuabang ahih manin, kuahiam khat beek in phattumna i neih khak leh chih deihna in, saptuamin i Toupa Jesu

vualzoua Jerusalema A Lutna phawkthakna ni hi dingin, Palm Sunday min vuahin nitan khat honbawl ua, i zang zel ua, a hoih mahmah hi. A lou theiloua zat ding chihna hial zaw om sam lou ding hi.

Kum tenga Palm Sunday i zat chianga i pansan uh Laisiangthou Zekariah 9:9; Matt. 21:1-11; Marka 11:1-11; Luka 19:28-40 leh Johan 12:12-19te ahi deuh hi. Ahi a, kum tenga kizangta ahihmanin, hiai thute i sim chiangin, Laisiangthou sunga thupi khenna dana, "Jesu Vualzoua Jerusalema A Lutna" chi-a kigelh pen mitdel sialkhau let mawka, thuthak, lathak om theilam ngaihsun lou hiala sim paisuak zungzung pawl i om tham dingin gintakhuai hi. Khenkhat inlah, thuthak banghiam muhkhiaka phat-tuampih ngei tuma tua Laisiangthou thute limtaka vela kipahna thak bang, kipiakna thak bang, hatna thak bang mu a, kipak mahmah pawl zong i om ding hi. Ahihkei leh, tuani-a

thugentu ten "Jesu Vualzoua Jerusalema A Lutna" siamtak, dangnaltak leh ngaihnop huai taka hon gen theih man ua, Palm Sunday lohching mahmaha ngai pawl bang zong ki om kha zenzen ding hi. Ahihkei leh, tua ni adinga hunsehsa kibawlte pelhem hetloua i zat theih a, tuani-a thilpiak lakkhawm, a sum a tampi a phak man zena Palm Sunday lohching dana ngai pawl zong ki omkha thei hi. Ahihkei leh, tua ni adinga Naupang lamte programme bang, a piching lamte programme bang nuam taka i zat theih ziaka hih fuh kisa mahmah pawl zong om thei lai ding hi.

Huchibanga lohching i kisak laiin, anuaia dotnate eimah mimal chiat kidong kha thei lai lehang a hoih sem ding in ka gingta mahmah hi:

1. Jesu Vualzoua Jerusalema a lut bangin eimah mimal lung sungah vualzouin a lutta hia?
2. Sabengtungnou kuate phel ahia, kua kiangah a pi ua?
3. Banghanga mipite'n a puante uh lamtawna phah nuam uh ahia?
4. Sabengtungnou tunga Jesu a tuan nungin kua thu in sabengtungnou a oma ale?
5. Sabengtungnou tugna Jesu a tuan akipanin mite'n sabengtungnou mah a mu lailai uhia?
6. Banghanga Jesu nung honzui mipite leh a malama pai mipite'n thukhat sata pahtawina sam thei uh hia?

Ei Zomite'n mi-etlahhuai lua i hi zenzen kei kha ding hi. Ei sanga hoihzaw, pilzaw, siamzaw, neizouzaw, thupizaw, lianzaw, sangzaw India gam sungah adimtakin a om hi. Hinapiin, tua mite tengteng tawmkaan in, Tuipi Galgam mite'n - Jesu' nungzuiten sabengtungnou kikhah a phel ua, Jesu kiangah honpi ua, a tunga Jesu a tuangsak umah bangin - 1910 kumin i gam sunga honglut in, Tangthupha honghilh ua, khelhna kol i buhlai hongphelsak ua, Jesu kiangah honpi ua, i tunga Jesu a tuang lel hitalou in, A Kha Siangthouin i lungtang sung hong luahta hi (Johan 14:16,17; 1Kor. 6:19,20; 2Kor. 5:17; Eph. 4:30). I hampah mahmah chih louh vual hilou hi. Ahia, sabengtungnou tunga Jesu a tuan akipanin, sabengtungnou pen ama utthu, ama hoihsakdan, ama

deihdanin a omta keia, a tunga tuangpa mit a sena, a tunga tuangpa etna lamlam ah a paia, a tunga tuangpa thuthuin a kihei hi, chi ua!! Sabengtungnou tungah Jesu a vualzou mahmah a, huaiziakin, Jesu thupina, Pathianna, thilhihtheihna leh hatnain sabengtungnou a luahdim a, mite'n sabengtungnou muta louin, a tunga tuangpa - Jesu kia a muta ua, thupina, lalna, pahtawina leh phatna kituak takin leh lungsim munkhat puin a pia uhi. Himah lou hia?

Jesu Khrist Hondampa sanga, piangthak kichitte peuhmah Kha Siangthou lungluahte, Jesu tuannate i hi hi. Ahihleh, i niteng hinkhua i vel mah uh awlle: Eimah tek ah Jesu a vualzou gige hia? Kua thtu, kua deihdan leh kua hoisakdanin i hinkhua uh i zang ua le? Jesu tunga eite vualzou zaw gige a, a Jesu pen vuallelsak nilouh houh i hikha kei umaw? I tunga Jesu a vualleh gige ziaka mite'n i tunga tuangpa Jesu mulou ua, ei kia hon mu uh ahi kha mai kei maw? Diktatna a hoih dan i gen thei chiat ua, hoih leng i sa chiat uhi, ahihhangin kuama'n diktat i sawm tuan kei chiat uh a bang hi. Siangthouna a hoih i chi ua, i

kigenteh souhsouh ua, kuama'n siangthou taka i hinkhua zat i tum tuan kei jel uhi. Saptuam makai, saptuam heutu-a i neihte hiin a mipi vantang mahmah hitalehang i kivel thak chiat kul lua hi! Mite'n eia Jesu a muh louh ua ei a hon muh gige mawk chaing un i paina ding lampia a puante uh phah theilou ua, Pathian pahtawi theilou ding mah hi. Hinapi a, ei kihisak in, na upapa uh, na pastorpa uh, na sawltakpa uh, na directorpa uh, na heutupa uh ka hi, chi chi lehang leng mite'n ei-a Jesu a muhlouh maimah chiang ua honpahtawi theilou mah uh hizaw kha ding hi. Eite'n i hoihna gen ding i hau thei lua ua, mi hoihlouhna i muhte mahmah uhi. Huchi hilouin, mite'n ei hoih honsa uhen la, eite'n i hoihna sangin i chinlahna kimuzaw lehang dikdek pan ding hi. I Toupa Jesu'n zaw, mite'n, "Heutupa Hoih" a chih ua leh, "Bangdia hoih hon chi, mi khat kia loungal a hoih omlou hi, huai mi tuh Pathian ahi," chi-a dawng mah hiven. Leitunga degree omthei tengteng lazou vekin, dinmun lianpen pente len mahlehang, i tunga Jesu a tuan keia, eia Jesu mite'n a muh theih kei maimah leh poi mahmah ding hi. Thamloua, Jesu thu zui loupi a Pathian Saptuam ei thuthu a pi i sawm khak zenzen lehouh,

Pathian' chitnain a dohzoh nawnlough hun chaingin i pang man kei hial ding hi. I degree neihte leh eimah mah zong Setanin vanzat hiamtaka zang thei tham ahi, chih mangngilh kha mahmah kei ni.

Chiklai peuha i lungsima i ngaih poimoh pen ding a deihuai mahmah zaw, Jesu vualzoua Jerusalema a lut bang in eimah lungsung ah vualzouin Jesu i lutsakta hia? Sabengtung nou n Jesu etna lamlam, chihna lamlam, deihdan dan a zuih angin, eite'n leng Jesu thu i mang zel na hiam? Chi-a nitenga

i kivel gige ua, kipatthak ngaite i pat thak ua, tawpsan dingte i tawpsan ua, eimaha mite'n Jesu a muh teitei theihna ding ua i kihanchiam chiat uh deihuai mahmah hi. I Office kainate ah i loukuannate ah, i chialpinate ah, i saptuam etkolnate ah, i loukuannate ah, i chialpinate ah, i saptuam etkolnate ah, i bazar keinate, i college kaina te, i skul kainate, i nasepnate, i heutu hihnate ah Jesu a vualzoupenin pangsakta ni.

Toupa'n A thu i tan chiat ah, taksuah dingin honvualzawlsakta hen, Amen.

REMEMBER ME


H N Khankhual
Karbi Anglong, Assam

Huan, aman, Jesu thuneihna toh Kumpipa a na hongpai chiang in, hon thei gige in a chi a. (Lk. 23:42)

I Laisiangthou changteelna uh i et leh, a thupi leh poimoh mahmah khat tuh, I Toupa Jesu Khrist Kros tunga a kikhai lai in, A taklam a kikhai pa'n, "Hon thei gige in" a chih ahi. Nungak leh

tangval hiam, lawmta kingai mahmah te'n kimang ngilhloh ding a ut man un, hiai thumal - "Remember Me" chih zang in aki kam vaikhak uhi. Hiai bang kam ki vaikhak tuah i ngaihtuah chiangin, mite theih gige leh mangngilh loh hih ding uthuai ahih dan alang hi. Hiai i damsung hun lel in le mite theih aom uthuai leh hamphat huai ahihna tampi

om hi.. Josep in Aigupta gamsung a vai a hawm laiin, a sanggamte Kanan gama apan puktaw/ ann paw ding in a va kuan ua, Josep in a sanggamte a muh in a thei lai hi (Gen 42:7). A utte a hihlam thei lua ahihman in a ipte uh hih dimsak dingin thu apia a, asum tawite uh leng lase lou in a ip mah uah guang kiksak hi (Gen 42:25). Hiai apan in leng, milian mi lalten honna theih ua om hi nakpi takin a phatuam a a uthuai hi chih i thei hi.



Etsakna dingin, Saplian khat i vaidawn na ah sappan hon thei tuam deuh henla, hon houpih tuam deuh taleh, midangte sang a hampaha zaw a kikoih kia gentak louh, i maitai zawk deuh banah i inteeek panpah dingin a gintak huai hi. Khenkhatte bang houh kihhsak loh hial uh ahi hi. Tua bangmah in den hun chianga i Toupa Jesu Khrist thuneihna sangpen toh kumpipa in a hongpai ding a, Amah i vaidawn hun chiangin bang chilel in vai dawn i sawm a le? Amah theih te laka tel khak hia i ut? Amah theih khak louhte lak? Huai ni chiangin i Toupa'n honna thei mahmah taleh bangzahta ina anuam dia Unau! Alehlam ah "Chihtak takin chihtak takin

kon hilh ahi, kon thei kha ngei kei" (Mathai 25:12), a chih san mite lakah i tel kha maimah diam chih lauhuai petmah hi. Tua bang mite adingin bangzah ta a maizum h u a i hiding hiam hiam Unau kingaihtuah taktak ni. Tua ni sawt nawnlou maithei ahi, Pa kia loungal kua man a thei kei.

Kros tunga Toupa si dinga kilhden a aomlai in, a taklam pang a kikhai suamhat pan Toupa hihna diktak a nathei chian a, "Toupa thuneihna toh kumpi a na hong pai nawn chiangin hon thei gige in aw" chin na kam vaikhak hi. Toupan tuni'n ka kiangah Paradise ah na om sam ding, chihin dawn pah lian hi(Luka 23:26). Huaiziak in Toupa toh kichiamna kituahna kam vaikhak i neih masak keileh den hianga i kituah hun chia en thei diang, himahleh Aman hon thei lou mai dia poi law ding ahi, Amah lah thuneitu a hingal a. Unau it! Toupa toh kituahna kichiah chianna na neita hia? A taklama pa bangin "Remember me" na chi ta hia? Toupan, Ka kiangah "Paradise ah" na om sam ding achita hia?

JESU KHRIST ADAWNNA AHI

Pastor H Jamkhanpau
Tonglon Area Pastor

“Amah (Jesu Khrist) Pathian bukimna tengteng a om Pa deiham tak ahi” (Kol. 1:19) “Kou zaw thum leh thunasem in ka om zaw ngitnget ding uh” (Nas 6:4).

Tulai hun nanung ahihtakmanin buaina tuamtuam nam, gam, saptuam, khotang leh innkuan atamta a, huaiin Kham dinmun siatna leh niamna hon tunin, aziak tuam tuam zongin, panlak leh pawltuam tanpha phut leh lutin, semtute phunna leh lungkim lahna ngenin i dimta uhi. Himahleh, JESU KHRIST bangkim a Pathian bukimna leh lupen mah dawwna bukim omna ahia, thumna leh thunasepna mah a dawwna ding ahi chih velthak in ki enchiam thak ni.

1. **SAPTUAM' TAKSAP JESU KHRIST ADAWNNA AHI (Nas. 6:1-7):**

1. **Tamlam a khanna hilou, Jesu hoihna a khanna a hoihpen ahi:** Nasepte 6 i et chiangin tamlam akhanna (quantity) hoihpen khollou

bang a, buaina/phunna om zaw a, Jesu Khrist nasepna a kipiakna diktak apan a pianthakna akhanna mah a hoihpen leh damna ahi zaw hi. Aziak bel, Jesu a khandan diktak hilou a, tamlam kia akhanna ah phunna, lungkim louhna a pumdim in saptuam dam theilou hi. Jesu Khrist a kibulphuh a, thum leh thu nasem a saptuam i om chiangin mipi kipahna leh saptuam damna ahi-Jesu Khrist adawwna.

2. **Salam taksap muhna hilou, Jesu adawwna ahi:**

Nasepte 6 ah salam taksap panpihna leh thilhawm kia ahon buaipih chiang un mipite lak a phunna leh kipawl khenna tanpha tunin mipite lakah kipahna omlou a, thumna leh thunasep a hong kipiak chiangun saptuam mipi kipakin hotdam lelte kibeh lapna tanpha tun ahimanin i gentheihna, i taksapna leh buainate kia masuan a, salam taksapna muhna pibawl a, sum-le-pai a

saptuam bawla i buaipih
ziakin-phunna a pum dim lel
in i om ua Jesu Khrist mah
a dawnna bukim Pa deiham
ahia, koimah ah dawnna na
mukei ding unau.

3. **Vaihawmna dohkan hilou, Jesu Khrist a dawnna ahi:** Nasepte 6 ah vaihawmna dohkan a thupi bawl zoh peuh uleh mipi phuntam in kikhen na om a, thum leh thunasep a akiptak zawk chiangun mipi kipakin hotdam kibehlapna tun hi. Huaiziakin, makai atel uh leng Kha leh pilna a dim atelna uh damna ahi, tulai local saptuam makai te'n i dinmun leh mohpuakna theilou a, vaihawmna kia sa a, thunasep ngaihsak lou a, i omna mah buaina ahia, vaihawmna a mipi kipahna leh hotdam kibeh lapna dingin thum leh thunasep Jesu Khrist akiptakna, Kha leh pilna a dimna mah a dawnna ahi. Tulel saptuam kivaipukna ah saptuam khan Pastor khamitna leh nasep poimoh pen hithou mah leh, local makaite lemsakna leh lemsak louhna a kinga a sem ahiah zawk manun, thuneihna tawitute a chabi (key) tawitu ahi ua,

Jesu Khrist akiptak a thunasem a abuai uh saptuam damna leh khanna dia adawnna ahi. Huaiziakin, pankhawmna, mah saptuam taksap-Jesu a dawnna ahi. theikhial kei ni.

4. **Dinmun (Position), thugen hilou, Jesu Khrist a dawnna ahi:** (1Kor. 1:1-2:6): Korinth saptuam Kha thilpiak haute, apil leh genthei ngen hihtuak ua, huaimah Paul a Pawl, Kifa pawl chih pianna ana hizel. Paul in, Khrist kikhenlou Amah bangkim honpetu, bukimna leh thilhih theihna, amah a saptuam akingak a, Kha leh pilna a thugen ahildan thutak lakin - Jesu mah adawnna, damna ahildan gen hi. Tulai a kivel tuak, nasepna leh thugente leng thugen siam dan in i ki et thohta a, mipiten hoih leh hoihlouh chauh teh ding a kuan mah i bangta a, i kikhonate uh, hiai dinmun ah Jesu mah a dawnna ahizaw a, tua mah pilna sangin poimoh pen hi. Hiai kia hilou in mi tam takin, mipi tam lua dinmun neiphalou, thugen ngeilou, mimal i kizat khak kei leh kimang, kizat theihna saptuam mah poimoh chin dinmun thu i buaipih a, en un! Jesu adawnna ahi amah nna

neipa, honsampa leh Kha thilpiakte honpepa ahi dinmun khat len a semdi hon chih leh aman lampi hon bawl a, hon dop sang ding ahi, mihing pilna a phutsuah lohsapna leh buaina ahi zaw. Tua ziakin, Kha thilpiak leh sapna kichian nei hiloupi, i kizat hanhan theihna pawlte bang ah i lut ua, bang i gahsuaah ua leh samitna mah a tawp hilim zawlou hia. Amah a Pathian bukimna om Pa deihlam ahia, Jesu adawanna ahia, tua thutak ah dingkipin, hon seh dan lungkim in kipahna leh damna ahi.

5. **Dollar hilou, Jesu Khrist ahi:** I gam saptuam dinmun ah ei leh ei kitou delh zoulou, saptuam lian zop leh dollar a panpihna i poimohna om mah ahi. Himahleh, eimah Jesu Khrist a kikepna leh nasepna a lou in tuate a saptuam taksap dawanna bukim kuan theilou ahi. Tumlam gam ten leng Jesu Khrist a kipiakna hohtak nei a, ama nasepna dia itna taktak toh hon panpih ahiman un i zatdan ah Jesu Khrist ah mohpuakna liantak kinei ahi, omsa saptuam phelkhapna azat maipen mulkimhuai hi. Jesu Khrist thutak a kipuh kip a, a thupiak bang tak a diktak a sep ding ahi.

II. **INKUAN, KHOTANG TAKSAP DAWNNA - JESU KHRIST AHI:**

Innkuan leh khotang buaina i tuahte pen nidang laipek/ abul apan nu-le-pa ten innkuan sung kikepna ngaihsak lou a zalentak a i omna gah ahi. Huaiziakin, tua theilou a, i omdan ngei sun zom a, nu-le-pa aneu alian innkuan zalen taka lup hun annek hun leh nasep hun, hun zatkhomte bawl tuanlou a utdan chiat a i om touh leh innkuan chih omlou dinmun tun theih leh khotang leh saptuam i se mahmah ding hi. Hiai dinmun ah bangteng in panla mah leng bitna a om kei dia, Jesu Khrist mah adawanna amah a kitulut a, athu bang a pan il ak ding uh ahi.

1. Innkuan pen Pathian puh khat (Gen. 2:18-24), leitung kivaipuakna tengteng laka upapen ahizhiakin, khotang leh saptuam sanga ngaihpomoh zawk hoih ding ahi.
2. Toupa lupen anei in (1Kor. 11:3), ama lampih theihna dingin (Sam 127, 128) - innsung maicham nei gige

in, hotdamna leh a thute kisinsakin - Pathian tangchinna Jesu Khrist ah kibulphuh kip phot leng - Amah a dawnna ahi.

3. Pawt hun, lup hun, annek hun, leh nasep hun omsak in, biakin kai hun akai geih a, tualou khotang kipawl khawm a pawtte tawmsak leng i bit ding hi. Khotang leh saptuam vaihawm leh nasep leng hongnuam pah ding hi.

III. SAPTUAM NASEP-DAWNNA JESU KHRIST AHI:

1. Pathian nasemtu ten leng Ama' honsapna ah kipe dikin, a nna theichian in semphot leng Khalam leh salam taksapte honpe ding ahihman adawanna Jesu Khrist ahi.
2. Pathian' saptuamte itna toh Jesu banga hinna pia in Ama deihlam semkhia dingin kipe tinten leng. Saptuam khanna Jesu Khrist adawanna - Pa bukimna ahi.
3. Jesu Khrist deihna theichianin

sem leng vaihawmna leng hong dik dia, i hinna leh nasepna leng hong dik dia, haksatna leh buaina bang zahta tuak mah leng Amah i bitna leh i kaisanna ahihmanin - Jesu Khrist adawanna ahi.

4. Programme hilou - Jesu Khrist adawanna ahi. Programme hoih poimoh mah leh Jesu Khrist leh Khasiangthou mah Pathian tangchinna, i hotdamna, thilhih theihna, khanna leh taksap tengteng hon guantu ahihmanin - Amah i poimoh dan theiin sam leng Jesu Khrist adawanna ahi.

Huaiziakin, tu hun nanung buaina pungtou zel ah saptuam, innkuan ah - Jesu Khrist thutak ah Pathian bukimna omna leh Pa deihna bukimna ahihmanin - Jesu Khrist diktak leh bukimtak in pekhe leng saptuam, innkuan leh khotang damin, khangin, kipahna toh kidim in, lungkimna neitheih ding i hihmanin - JESU KHRIST ADAWNNA AHI - thumna leh thunasep ah om ngitnget ni unau.

CHARITABLE WORK THUPITAK OM

Apaisa March 17th. 2001 in Central Lamka KTP in **ITNA** nasep (Charitable Work) First Action in Tedim Road, Lamka ah thupitakin nei zuazua ua lamlian kuaknate vuk dim uhi. Hiai hun ah Pu G Vungkhum in Central Lamka in Truck thoh hi.

HUN NANUNG A THILTUNG DING GENKHOLHNA LEH A TANGTUN DAN

H Thangson
Grace Bible College

Bible in hun nanunga thiltung ding a genkholhte tapi a hongtangtungta a. Messia tungtang genkholhna zathum vel tuh Jesu Khrist hongpai masak lain a hongtangtung vek ta hi. A hongpai nawna (second coming) tungtang a genkholhna leh a tangtun dan bang zahhiam te tuin genkhawm leng uthuai i sa hi. Khrist hongpai nawna a naitak dan leh kiging loute leh kiman loute kimansa a om hun ahiehtak dan i theihna ding un, hiai thu saulou houlim leng i chi hi.

1. **Israel Solkal:** Kum 4000 pailiamsa a Pathian in Abraham kianga gam ana chiam leh piakna mun ah Israel Solkal a hong ding khe taktak a, tua in thukhun lui leh thukhun thak genkholhna tuh i mitmuh uah ahong tangtung sak chih a Chiang mahmah hi. Israel gam luahtu Judate ngei tuh Pathian genkholh bangin Khovel killi apan a hongpai khawmte ahi ua. Tunglam leh

nuailam van zatzang in aki nawnkhawm zungzung ua, kum tengin a pung semsem uhi. Khovel solkal pangkhawm (UNO) buaipih tham in a hong thupi ta uh.

2. Jawlnei Danial in hun nanung ah theihna leh pilna a hong pung ding chih thu leh khualzinna toh kisai a mihingte changkan ding dan BC 530 vel in ana genkhola, "mi tapi a vialtai ding ua, theihna a pung ding hi" (Dan. 12:4) chiin ana genkhol hi. A hong tangtun dan gen ngailou a i theih uh a lamet huai hi. Khovel mihingte siamna in tunglam ah leh nuailam ah, galvan iki taiteh ta uh hilou hia?
3. Genkholhna hong tangtung zelte laka chiamteh tham tuh - hun nanunga hunhaksa hong om ding bang, khovel pumpi a khelhna, sum leh pai ngaihluatna leh Pathian it sanga eimah kipahna'ng ngaihtuah zawkna bang

pung hulhul maituh ahi (2Tim. 3:1-4).

“Thuhilhna dik ngaihkhiaik ngaplouh hun a hongtung ding (2Tim. 4:3)” chia Paul in ana genkholh tuh tuin i muh Chiang mah mah uh a gintakhuai hi. Thutak lakah bil i ngong sak uh a, kovel thilte ah bil i vak sak zawta uh. Pathian pahtawina sangin Diabol pahtawina (Rock Music) khawngin i lungtang uleh bil uh a taisak zouta hi.

4. Zawlni taklou leh sinsakna diklou hongpawt ding thute thugin lauhuai taktak a hon paipih ding thu uh genkholhna leng a tangtung zel hi. Hiaibang thilte Khristian gam ah a tamsem chih ding ahi. Hiaite laka pilvang dingin Laisiangthou in hon hilh hi (2Pet. 2:1-2; 2Tim 4:3-4; Matt. 7:15; Juda 4).
5. Kidou leh kidou thuthangte kialte, zinlingte leh hilengte, tua bang a om dingthu Jesu'n ana genkhol hi (Lk. 21:10,11). Hiai thilte tuma lam pek a pan ana om sek himahleh tulai banga thupi leh nasa in a om ngei kei hi. Kidou thu leh kidou thuthang kia zak in a omta a, galvan

a hoih hiaihiai a, kidouna leng a thupi in a mulkimhuai semsem hi. Hu chih laiin gam khenkhat ah gilkiak dangtakin tampi a si ua. Zinling a tam hiai hiai a, a thupi semsem a, tua in hi (natna hi) a leng sak a, kial a kesak hi. Mun khenkhat ah vuahtui kiaklouh (khawkheng) ziaik a thuakna leh buaina a om laiin mun dangah Cyclone huihpi a nunga menchim zuazua khawp in vuah a zu zel a, a kumsim in a tam huaihuai zomah hi.

Hiaite kia louleng Pathian thugenkholh hong tangtung gen ding tampi a om. I genseng kei dinga, i sut seng kei ding uh. Huaiziakin a poimoh pen tuh Toupa tuak dinga mansa a om ahita. Johan in “Naute aw, hunna nungpen hita e” (1John 2:18) chi a ana gen tuh a hong dikta hi. Toupa genkholh thil tunglou him him om nawnlou chih ding ahita. A tungnailou tuh” A hongpai nawnna” ahi. Chikchiang in ahongpai dinga, sun in hia? zan laiin? chih i thei kei uh. Himahleh ahogpai hun ding anaita chih bel i theita uhi. Huaiziakin amah tuak dingin mansa in i om chiat ding uh.

Lamka Christopher Sun Crusade 2001
March 7-11, 2001



Crusade Hall bawlna dia sai Pawlte leh Thugentu leh Kamlettute lemlak ahi.



Crusade sunga Lapitute leh Thugentu leh Kamlettute lemlak ahi.



Citiwide Crusade sunga Steward Papi leh Nupi 100te lemlak ahi

Lamka Christopher Sun Crusade 2001
March 7-11, 2001



Citiwide Crusade sunga Counsellorte leh Thugentu leh Kamlettute lemlak ahi.



Crusade sunga maitam sapna nanungpen a hongpai Jesu kiang zuante ahi uh.



Maitam sapna huna Jesu kiang zuan a hongpai mipite ahi.

KI HOUPIHNA SIKGUI BUAI NGEILOU

V Ginsianthang
ACTS, Korea

Pathian hehpihna, saptuam phasakpih leh thumsakna toh jilna maban zom dingin January 30, 2000 in' Lamka ka nusia a, February 7, 2000 in Asian Center for Theological Studies and Mission (ACTS) Korea ka tunga, damin maban ka sawn thei jel hi.

Hiai tan honpi a pi jeel ding Pathian tung leh saptuam tung ah ka kipak mahmah hi. South Korea hi gam changkang tak ahih bangin thupi in nuam kasa a, a biktakin saptuam omte thupi uleh thil tam takah etton ching uh kasa hi. Himahleh, Korea zong leitung mah ahi a, thilteng bel 'hoihvek' or 'bukimvek' tuanlou dan ahi. Tua a hihmanin ken zong a nuam leh haksa gen ding ka tuak paha, Davik chih banga "kei lama pang Toupa hilou hileh..." ka chih hun a om pah hi. Huaijiakin saulouin ka thiltuah leh muhthak khenkhat, Pathian thupina ding deihna in kong kum nuam hi. Huai tuh bangdang hilou, innlam maha zong, abiihtakin UBS Pune a BD ka sinlai apan katuah (experienced) zeuh zeuh, kihoupihna sikgui (telephone) zat

toh kisai a hia, "line-te buai lua" (all line are busy) chih zaak sek leh deih hun leh utbanga zat theilouh/zohlouh bana, a changa 'line' muhlouh hithet ton a tama, hiai apan ngaihtuah leh phawkkhiak thil tampi ka nei hi.

Vangtah huai i chidiam ka zin ding kuantakin ka zi Hauvung hong ngap kei a, a kal a suang aat ngaiin hongom hi. Pathian mina kalsuanna hi keileh ka zinna ding khawlsan phot tuak kasa hi. Tua ahih manin bangtan hiam sung tuh "Bang achi deuhta diam aw" chih theih nopna'n ka dim a, a na ki aat nung nangawn in amah 'aw' tektek ka zakma patauhna khat ka nei nilouh hi. Delhi a ka omlai mahin houpih theihna ding zongin ka buai pah hi. A hihhangin haksatna ompah, tua hatsatnate tuh ka tuahsa leh Korea ka tunnung a zong ka tuah jel-te mah ahi uh. Khatna, mahni telephone kineilou, mi a zat ngai, a saap piak ngaih bana houpih nopte sapsak masak (appointment) ngai, neilou selua in a thuah (double) a sum sen

ngai veu. Nihna, ki houpihman (fee) tam, sum ki tawm neih, utbang kizang zoulou. Thumna, neih bang bang toh houpih i sawm chia zong ut hun geiha line kimu gige lou, "**line-te buai lua**" chih zak hi veu, bana line i muh sun chia zong deihzah hun kingah gige lou lai! (Mi hausa leh mahni telephone/hand phone neite adia zong "line buai lua" leh "line or system kisia" om thei veve). Huaiziakin, haksapi maha ka houpih theih chiangin nuam kasain ka aam mah mah sek hi. Hiai thu mah lawmte khenkhat toh ka genkhawm kha ua, khatin tuh, "...houpihpih kullou, sum heksak, laithon hun..." a chi a, a dikna Chiang om mah leh dikvek kasak louh thu ka gen sek hi.

Hichi bang ka thil tuah leh houlimnate un athak takin THUMNA pawimoh dan leh manphat dan hon ngaihtuah sakin mu chiansak sem hi. **Khatna ah**, THUMNA tuh Pathian toh tangtaka (directly) ki houpihna sigui bang ahi. Gingtute a dingin Laisiangthou a poimawh mahmah. Ahizongin, Laisiangthou sim leh theih tan hunsa a THUMNA ngaihsak louh/pibawl louh thil om thei leh lauhuai tak ahi. Ka houlimpah lawmpa kiangah, ".....laithon zong hoih, ahilhanga

'aw' mah mah kiza a ki houpih tuah (both side communication) zong a manphatna leh poimawhna om; laithon a ki houpih leh telephone a kihoupih kibanglou ahi" ka chi hi. Hiai bang deuh in THUMNA tuh gingtute adinga Pathian toh ki thuzak tuahna dia pawimoh mahmah ahi. Huaijiakin, thumna tuh gingtute a dinga nakna ahih ban ah, i haksatna or kipahna Pathian kiang tuna; en Pathian houpih kia hilou a, Amah apan pahtakna aw hiam, hehnepna aw hiam, salhna or thuhilhna don theihna ahih banah, Pathian toh thu-kikup theihna ahi a, a pawimohin a manpha hi. Rev S Vungminthang in 1999 EBC Lamka District Mission Khawmpi a a gen khak, lungluttaka thumna leh naungek dangtak vilvel, nunu hong tunphet a khodak manlou leh nak hithit kawma nawitap a tehkak dik kasa hi. Lawm leh vualte/mihingin hon phawk louha, ban leh hatlou hiam, haksatna leh buaina tuamtuamte jiaka lamet bei leh beidong taka i omin zong THUMNA in Pathian i pawl (commune) thei gige hi. (IPet. 5:7). Thumna i chih thil ngetna kia hilou a, Pathian toh kithuahna, mah zong na hipah ahi.

Nihna ah, sikgui zanga ki houpihna dingin a man piak a ngai. A thawna zang kichite zong, kua hiam khatin natuak dan ahi. Mi khenkhatin a thawna telephone zat deuh gige ding a sawm tinten ua, zong a zangtakpi uh. Lupna tunga janpuan lum hithit nuaia thumna neih toh ka teha, chihdan siam uh kasa hi. Mun khat peuh apan thum lehang zong Pathian in bel aza ding; a hizongin aman pengap lou hiam mahni nopsakna ding leh metna ding kia khual kawma thumna neih bel Pathian deiham hi'n i mu kei. Jesu thum dan, hun zat dan leh thumna munte a panin ki suukna ding leh a man piak ding om a hihdan i mu thei hi. Tuajiak mah ahi dia, awlsam tak kia a thumna hun zangte sangin; jing khovot leh haksapi maha thumna hun zang thei jelte a ki paak zaw nak uh hi'n a lang. A mun leh hun jil bel omin chin; ahi zongin thil khatpeuha awlsam leh baiham kia zon gige thildik ahi kei; nungjuihna toh ki kalh ahi. A man i piak toh kituakin thumna i nuampih (enjoy) ngei ding hi.

Thumna ah, mihingte ki houpihna sikgui a man a tam a, a sikgui zong buai lua or kisia thei ahih manin ut hun leh ut dandan in a kizang zou/thei gige kei.

Himahleh Pathian houpihna sikgui bel sum kuullou, nang na kiman nak leh line buailaw ngeilou, se ngeilou, nikhat a dakkal 24 mah honsa a omden ahi. Paul in hiai thutak theiin, "tawplouin thum un...." (1Thess. 5:17) a chi hi. Bang dia en "hi thei taktak kenteh" chi ding e? Pathian houpih nadia mihing bawltawm telephone zat kuul hileh, tampi takin Pathian houpih thei hi tel hanga, i hampha ngei e!

THUKHITNA: Mihingte'n a nuam ahaksa i tuahte leh lung hihmawhnate, i itpen/muanpen leh hon itpen dia i gintakte kianga gen/zaksak kal i ngaklah sek hi. Ei gen kia hilouin amau apan zong i za ut gige. Sa dan a it leh ngaihte toh sikguia ki houpih lel zong nuam leh manpha ahih leh; hon itpen leh muanhuai pen, bangkima bangkim Pathian toh ki houtuah anuam seem ding chih theihsa ahi. Na sinta hia? Hiai khovel buai leh thawm ging vengvung laka Pathian houpih theihna leh Pathian aw zak theihna sikgui buai ngeilou THUMNA ahi. A jawng leh hau deidanna omlou, line se ngeilou leh uttan leh utdan a zat theih ahi. Toupa'n simtuten THUMNA manphat dan theichian leh hamphat pih dingin hon vualzawl hen.

MTV GENERATION & PATHIAN THUTAK KINGAKNA

Pastor M Chinkhotuan
Contributing Editor

Tulai Khawvel ah leitung khantouhna toh kisai paitou zel dan ahi chih pom leh ngaisang mahmah pawlte'n, abikin tulai khangthakte lakah hinkhua thiltung zelte pansanin, hiai nopsakna utluatna chikhat ahi chia a ngaiin, lunggulhna lianpi (kingakna chinglou) tuh bang hihiam i chihleh hiai "MTV Genaretion" kichi ahi. Mitmuh theih utna hong suak thei chi tuamtuam, khang thakte lakah hiai tuh a thangpen ahi. Hiai thil tuh diktakin hong kipatkiakna bulpi bang hihiam i chihleh "Mahni ki diksakna" (Self centredness) a hong piang ahi. Hichi bang gamtatna ina taklat thupi pen tuh "Kei mahmah" hiam "Kei mahni" chihte zanga thil hih ahi. Laisiangthou in hiai thumalte eimah a sihsak hiam kimangngilh ding chih hon sinsdak lah ahi ngal a, ahileh akikalh hilou ding hiam? Hichi bang gamtatna leklua hiam uanglua ten tulaiin khangthakte a zelsuak nasa mahmah! Thamlou in leitung bup huapa gamtatna tuh **Generation-X** hiam **MTV Generation** chihin om hialta hi.

Generation-X Facts Toh

Kisai Tangpite:

- ? Khangthakte kum 18 apan 33 kikal mite ahi uh
- ? Leitung bup huap hiai Generation-X kichite a gawmkhawm billion nih sanga tam pha uhi.
- ? Mihing khangthu a dia khanglian pen kihi sak uh
- ? Tumlam gamte'n MTV Generation kihisak bik uh
- ? Khang pai masate sanga a zalenna lauhuai zaw neite
- ? Ahon a om leh gamtat uangbawl mite ahi uh
- ? Pathian thutak sanga a hona gamtat kiphamoh sazaw te
- ? Leitung ahon a kigawm lianpen zaw a kingaite
- ? Leitung mite muanhuaina namte sanga khangthakte kihisakna
- ? Khangthakte ginna neih masang ua thil khat kulsa zawte
- ? Mahni mahmah uangbawl leh omdan a sulang bikte

Khangthakte Lunggulhna

Khang Zel: Tulai khangthakten hichi banga lunggulhna hong piang leitung khantouhna dan toh kituak in a ngaih sun ua, a dikna chiang om bangthei mahleh, hichi bang lunggulhna hiam thanoppihna pilvang mahmah akipha mohna theih kul: Aziak, Pathian thutak in bang gen hiam i chihleh "Mihing adia lampi dika kilawm a oma, himahleh huai tawpna tuh sihna lampite ahi" (paunakte 14: 12: 16:25) in achih ziakin.

Pathian Thutak Pansan In

Dingkip Ni: Laisiangthou thutak kingakna a nei, tua bang pansan a gamtang gige, huchibang mite a dingin hiai khawvel ah bangchi teng huih nung in tui kifawn zel mahleh a sulamdang zou tuan kei. Aziak: Pathian thutak a kingakna tuh hinna lah hi, nakna lah hi, bitna leh kipna lah hi, ahihman in. Thil tengteng a dia phatuam ahivek ngala (Nas 17:25; 1 Tim 4:8). Huaiziakin leitung ah bang chiteng a gamtatna ziakin huihning leh tui kifawn in hon tuam kivel mahleh, Pathian thutak ah chiklai peuhin dingkip gige ni chih tuh i kichialna ahi.

Khawvel Khang Touzel Ah:

Khawvel khangtou zelin eite damdam in hon tonpih a, himahleh hichi bang hun hoih hong kipia i

zatte ah a zat dan i siam kei maimah leh Pathian lungtun louhna suaksak thei zel mihingte ahi chih pilvang mahmah kul hi. Laisiangthou in, "Mihing lungtang in a lampi a ngaihtuah a: himahleh Toupan a kalsuante abawlsak hi" (Pau 16:9) achih tuh dik mahmah ahihmanin zuih ngeingei ding ahi. Huaiziakin, khawvel khang tou zel i chih chiangin Pathian thutak toh kiton a pai gige, Amah i hoihna dinga bangkim a hon sepsak, hon vualzawlpa ahihman inin limsak gige leh phawk tawntung ding ahi hi.

Leitung Pilna A Khanna:

Leitung ah mihingte pilna leh siamna nei ngei dinga pathian hon koih leh phasakna a nei mite i hi. Etsakna: Solomon in Pathian kiang a deihna banga kizatna din pilna a ngen a piakin a om ngal (1Sam 3:12). Bangteng hileh, siamna leh pilna tuh hon petu deihna leh phasakna bangbang a i zat ding ahi. Tulai khawvel in pilna in Pathian khlam thilte a theithei kei, himahleh eiten bel tuate theithei din khlam theihna leh pilna hon piak ngei neite i hihman in i hampaha khol diak uh a, Pathian in huai **ah kinga in dingkip** dingin **Toupa'n** hon vualzawl chiatta hen aw!

LAMKA CHRISTOPHER SUN CRUSADE 2001

Rev V Pumkam
Co-ordinator LCSC

New Millenium leh tu kumzabi 21na a Lamka Khawpi a dinga Crusade om masapen leh lawhching pen March 7-11, 2001 sung Ebenezer Academy Campus New Lamka ah om hi. A tel kha photin khatvei kikhop kia deih khoplouin - a tel tampeuh uh leh nuamsa deuhdeuh ua, midangte'n leng a theih sam ding uh deih in a lawmte uh hon ban hilh in, kikhop tengin mipi pung huaihuai in, Crusade hall sung leh pua a om kizah zou gige hi.

Crusade Hongkipat Dan:

Nidang in Dr Christopher Sun kua hi a, bang sem hiam chih kiza kha ngeilou a, hichibang Pathian gam nasepna a neih lamleng kizangei lou hi. Ahi zongin July 2000 in Amsterdam khopi a Billy Graham saina Khawmpina ah Rev L Kham Kho Lun, Executive Secretary, EBC toh va kimu kha in, tua hun in "thumna in kiphawk zelni aw" chiin hong kikhen uhi.

Huainung December 2000 in lai hong kithon tuah ua, aman Manipur ah EBC intekna in Crusade bawl a hong kuan ka ut a, ahi thei ding hiam? chiin heutupa donga, tua akipan kithuzak zelin January 2001 in lemsakpihna kipia in, huchiin

February kha sung kisakkholhna hun tomchik neiin March 7, 2001 nitak in hiai Crusade kipan hi.

Crusade Kisakkholhna: A hun lah tom, sum zat ding lah ompah lian lou, huchibang kalin, EBC heutute lemgel siamna toh sum om thei lamlam sawkin kisakkholhna lam tuamtuam ah panla in, Executive Committee ding bawlin, mohpuaknate kihawm sawn diu deu in, Publicity lam sai pawlten a mausa a kuantheihnate a kuanin, lehkha leh puante zangin hon puangzak ua, TV tungtawn bangin Cable networks tuam tuamten hon phuang zak ua, Music Dept. ten lasak dingte kisinin, vanzat tuamtuamte honkai khawm ua, Counselling Dept. ten Counsellor dingte sinsaknate pia in, thumnate hon organised ua, lehkha leh vanzat dingte hon kai khawm uhi.

Physical Dept. ten mipite a dia nuamthei pen ding leh kilawm thei pending in mi 10,000 bek takna ding Hall lam hon pan ua, a cheisiam ten rong tuamtuam in honchei in a Hall kia leng etet ut huai dingin hon bawl uhi. Programme lamte'n saptuamte

vehna hon bawlin, mipite chial leh thumna a phawk chiat dingin ngetnate bawl uhi.

Crusade Proqram: March 7, 2001 nitak dak 6:00 PM in Rev L Kham Kho Lun, Executive Secretary, EBC in a honna a neih zoh zoh toh kitonin mipite'n Pathian phatna Late music dept. te makaih in kisa zuazua a, Zenhang Lamka EBC - Tuailaite'n Hallelujah Chorus thupitak a sa in mipite lametna lianpi toh Thugentupa thugen kal ngaklah in kitu mitmet hi. Steward nupi & Papite siang huihiau, nuimai hui hiau in Hall sung leh pua ah mipite huhtu dingin nalh taktak a kichei in ding dim uhi.

Dr Christopher Sunin thugen hon pan a, a sermon masa penpen za kha photin a sermon nawn ding lametna toh kidimin mite om sak a, apat zan kia in leng sapna dawng (altar call) mi a za a sim theih hong ding khe ngal uhi.

Tua bang zelin niteng in zing lam dak 10:00 leh nitak dak 6:00 tengin Crusade program kizang tou a, saptuam pawl tuamtuam ten a Biakinn programmete uh khak zungzung in, Thugenpa lah kipezou deuhdeuh, March 11, 2001 a tawp nitak tanin sapna tuamtuam dawng mi 3,598 mahmah pha zou hi.

Christopher Sun Evange-istic

Association: Hiai pawl-saptuam zopbik neilouin Feb. 26, 1984 in Los Angeles khopi, USA ah puh khiat hi a, gam tuam tuam ah Crusade te bawlin, Khasiangthou thil hih theihna toh mi tamtakin hiai nasepna tungtawn in Jesu Khrist pomna nei in, hinkhua thakin hing uhi.

A mah Dr Christopher Sun in leitung siamna ah Master of Architechtue hihna leh Laisiangthou sinna lam ah Doctor of Philosophy in Systematic Theology ngah hi.

Aman zi Shirley Sun nei a, tapa khat leh tanu khat nei in USA ah teng uhi. Hiai Dr Sun pen Pathian laumi leh - amah him him kigenpha ut lou mi hi a, a thugen zakha peuh in lamdang sakna toh kidim uhi. Dr Sun in India a hongphak a thumveina hita a, March 27-31, 1996 in Guntur ah Crusade nei a, March 26-30, 1997 in Visakhapatnam ah nei in, March 7-11, 2001 in Lamka ah hong nei hi.

Toupa'n Dr Sun Khamangthang tamsem mantu dingin zang henla, mite gen bangin "Billy Graham of the East" hidingin Pathianin ompih denta hen. Hallelujah!

KTP LEADERS' CONFERENCE-CUM-SEMINAR

BOT (Board of Trustees) Thupukna No. 5(156th) Feb. 15, 2001 bangun, KTP Leaders' Conference-cum-Seminar 2001. Mimbung EBC, Mizoram ah May 3-6 sung om ding hi.

Hiai Conference ah KTP heutu 500 pai khawm ding a, tuate EBC District teng a Quota kihawm bangbang in hiding hi.

Sun hun teng Seminar hidia, nitak hunteng Conference hun in kizang ding a, Thugenpi dingin Rev L Kham Kho Lun, Executive Secretary hi ding hi.

- Seminar Topics:**
1. Biakna leh phatna
 2. Thugen dingdan & Sermon kisakkhoh dingdan.
 3. Mimal Laisiangthou sim ding dan.
 4. Tuailai heutu lawhching
 5. Personal Management
 6. Nektak zonna a masawn ding dan.
 7. Group discussion

Special Features: EBC Praise Bankten hiai hun in Biakna leh phatna makaih ding uhi. Hiai Conference a zat ding in sum Rs. 1.5 lakhs muh suah a, zat ding. Thumna in phawk chiat ni. Thuchiam kim zaw Youth Worker, EBC - Dorcas Hall New Lamka ah a kan theih ding. Hiai Conference huh nuamte'n chik lai peuhin sum a huhna EBC Head Office ah a tawm a tham atam gen lou in a thot theihgige ding.

ZOAR CAMP REPORT

February 22-26, 2001 sung Zoar Camp (Numei Camp) Mualnuam khua ah neihi ahi. Hiai hun a Thugenpi in Rev L Kham Kho Lun leh Pastor S Ginjam te'n "Toupa zong unla, na hing ding uh" (Amos 5:6a) chih thupi a nei in thugen uhi. Hiai Camp hunsung in Pathian Kha kithuahphinna lamdang tak mai tungin leh mihing simtheihna danin camp gahsuah muhtheih hiai bang jahi: Camper = 172; Piangthak=87; Halhthak=84; Hiai teng banah thil chiin hoihlou tawpsan dia kilan leng tampi om hi. Pathian min phat in om hen.

K Ginkhanthang, Secy. Zoar Camp/Mualnuam EBC

DOTNA LEH DAWNNA

Dawngtu: Rev. N. Vungzasin
Contributing Editor

Dongtu: Nengkhohau, Aibulon.

Dotna 1na: I Samuel 25:1 apan a i sim leh Samuel sihna leh vui a a-omna thute simkhak in om hi. Huchi ahiehleh II Samuel pen kua gelh hi ding ahia? Samuel lah si khinta chi ngal a....

Dawnna: Samuel Ina & Inate athu kizom, seh nih a kikhen, kipatna bul kibang ahi uh. Himahleh hiai laibu gelhtu kua hiam chih a bu a genna omlou ahihman in dotna tam mahmah khat asuak hi. Laisiangthou sut mite'n Jawlnei Nathan' tapa Jabud (I Kumpipate 4:5) in a gelh hi di'n ki gingta hi. Zabud in a pa Nathan a kipan in David vaihawmna leh thu court a kigelh a pan theihkhiak ahi ngei ding achi uhi. Hiai laibu gelhtupa BC 930 vel, Solomon sih nung zek a hong om hi ding in a gingta uhi. tua lalgam seh-nih a akhen nung/hun chihna ahi. Tua ahihman in Samuel, Saul leh Davidte hinkhua leh tanchin gelh a omte na mupha ban ding in Zabud tuh a ginlelh huai kei mahmah hi. Huaiziak in, hiai Samuel Ina leh Ina-te Samuel gelh hilou in Zabud, Jawlnei Nathan tapa in Samuel Israel tangthu a Toupa khut zat poimoh ahih dan thu ana gelh hizaw ding

ahi.

Dotna 2na: Kronikil Ina leh Ina ah Israel leh Judate tangthu suina ngen i simkha ua, ahiehleh Kronikil bang genna ahia, kuate pau ahia?

Dawnna: Hebrew a 'dibre hayyamim' kichi tuh "Kumte or nite a thiltung or omte" (events) genna ahi. Thukhunlui laibute, Greek pau a letkhetute'n hiai 'Kronikil' (Chronicle) tuh "maih or gelhkhak louh a nawtsiat a omte" (things omitted) chihna achi uh. Tua bel Samuel leh Kumpipate a kigelh kimloute behlapna a chihna ahi. Huaiziak in hiai Kronikil tuh Jerome gendan in 'Israel tangthu pumpi gelhna laibu' or 'tangthu bu' (Chronicle of the whole sacred history) or khangthu sutna laibu ahi a, eiten leng "tangthu" i chi uhi.

Dotna 3na: Mathai 5:34 ah "chiam himhim kichiam kei un, lei lou in hiam van lou in hiam kichiam kei un" a chi a, David hunlai inlah kichiam a thangsak mahmah ua, thu hih kipna in a nei ua, bangchidan hiam hon hilhchian in.

Dawnna: Pathian in Dan sawmte apiak laiin "Toupa na Pathian min a phatuamlou/a mawkna in gen ken" a chi. thugina lou, thuzuau a khelhna khuhna dinga kichiam tuh Pathian tunga khelhna leh mihingte tunga diktat louhna, thudik louhna (injustice) ahia, Pathian

thangpaihna tuntu khat ahi. Hiai a 'Kichiamna' (swearing/oath) kichi thuzuau a kichiamna kia hilouin a poimoh loua kichaimna genna leng ahi. Tua ahihmanin Toupa Jesun kichiamna tengteng khamvek chihna ahi kei hi. Diktaka thudika Toupa min thupina dinga kichiamna tuh Khristian biakna kahiang poimoh khat ahi hi. Thudik leh thutaka kichiamna in thutak theihchian louh leh ginlelhte thudik ahina chih a hihkip hi. Toupa Jesun hiai thu a genlaina a tup/ngim tuh:

(a) Mihing ten kichiamna a neih ding chiangin a mau itna leh lainatna nei a thudik (Justice) chihna toh, mipi vaihawmna/ khotang gamtatna (common wealth) bawl dikna dinga kiselna/

kinaknate hihbei nading ahih ding ahi (Heb. 6:16).

(b) Khawksakna tellou leh zahtakna neilou pi (irrevent) a kichiamna, Pathian min gensia a kichiampen khelhna thupi mahmah ahi. Tuabang kichiamna tuh "hehpihna bei lungtang" ahi hi.

(c) Khristian kichiamna tuh lungsim siangthou nei a a Khristian pihte tunga a thutakna/ginomna (fidelity) lahna leh etsakna ahih ding ahi.

(d) Lei leh Van Pathian mahmah a kichiamna, theihpihtu (Deu. 30:19,20) ahihmanin mihingin kichiamna vanzat in a zang thei kei ding hi. Tua ahihmanin gitlouna leh khelhna dinga zuau a kichiam Jesun a kham hi.

SUKDIKNA:

T Beama

KTZ Feb. 2001 pek 7na -

"Khuambang luah" chih leh "Kuambang luah" , chihna ah a nanungzawk le Khuambang luah mah a chi a, meaningless a suak mawkta. 'h' tellou di ahi. Huaiziakin a dikna k'onsuah thaknawn hi:-

"Khuambang luah" - phalna nei, a phun a ham om loua, luahte ahi. Vangam ngial tuh hehpihna leh phalna a luahtheih ahikhol diak hi.

Ets. 1. "Khuambang ka luah ding Beaulah gam"

2. "Khuambang luah ding aw ka gamnuam" Kiptak, dettak,

lungmuangtaka luah di chihna.

"Kuambang luah ding" - thulou-haloua, hiam leh thal zanga sisansuah khopa le chiza loua gumgawtangsansa nohdoka luah chihna lam a kawak hi. (1997-1998) in i tenna gam uh kuambang luah tumin honnoh om uh hilou maw! ?).

Ets. Khang lummei bang jamtoug tange,

Douleng vangkhua suan inge;

Douleng vangkhua suan inge,

Lai ah sau-pei suang inge!

Ana entuah thaknawn di'n KTZ simtute k'on ngen hi.



Kipahthu Genna leh Thumna Makai

April 2001

1. Nipini:

Tuni khathak chidam taka honpikai nawntu i Pathian kiangah kipahthu gen in amin phatni. Tunin Suangdoh EBC Biakinn honna Executive Secretary in nei ding hi thuma in phawkni.

2. Seppatni:

Khalui March 7-11 sung Christopher Sun Crusade lohching tak leh manpha tak a zoh ahihtak manin kipahthu genni. Hiai hun a kilanthak tengteng 3,598 te a dingin Toupa makaihna ngenin thumni.

3. Sepnawnni:

Pastor Ph. Routhuam damlouhna ziakin Calcutta a damdawi Inn ah om hi. Amah lungna ban ah BP leh zunkhum leng nei lai ahi, thumna in phawkni.

4. Nilaini:

Mizoram District sunga tualsung saptuam tungtawn in naupang heutute toh fellowship leh kisinsakna nei dingin Child Worker leh Asst. Child Worker te omlel uh ni 16 tan daihdng hi, thumna in phawkni.

5. Ningani:

Tulai in Rev S Nengzakhup in IEM supporter-te vehna program neiin Shillong a mun tuamtuam ah hun zang hi, ni 14 tan daihdng ahi, thumna in phawkni.

6. Sintawpni:

Manipur Field a ding Superintendent mun awnglai a Rev V Jamkhanthang DS in enkol khawm hi. Tua pawtu a ding leh mun awng huka om theih nadingin thumni.

7. Kiginni:

Zingchiang Palm Sunday program ah Rev Dr Luaichinthang Director (MN) in Bungmual Bethany Biakinn ah thugen ding hi. Thumna in phawkni.

8. Nipini:

Tuni Palm Sunday mun chih a kizang dingte gahsuaah leh lohching taka zat ahihna dingin thumni. Jesu Khrist Jerusalem kia hilou in michih lungtang sungah vualzou in hong lut hen.

9. Seppatni:

Rev Dr Christopher Sun in June 6-10 sung Meerut, Kenya ah Crusade nei nawn ding. amah ading leh Crusade lohchinna dingin thumni.

10. Sepnawnni:

ZRO makai liante, hiang tuam tuam a makaite, banah nam sepaite a dingin thumsakni. Pathian zahtakna leh vaihawm siamna nei dingin thumni.

11. Nilaini:

Good Friday leh Easter Sunday programte ah Rev Dr Luaichinthang in Singngat ah zang ding hi. Lohching tak a zat ahihna dingin thumna in phawkni.

12. Ningani:

Zingchiang apan 15 tan Good Friday leh Easter Sunday Khajang ah Rev L Kham Kho Lun E/S in thugenna hun zang ding hi. Thumna in phawkni.

13. Sintawpni:

Tuni Good Friday 2001 mun chiha gah suahtak chiat a zat ahihna dingin thumni. Jesu Khrist sihna thupha khawvelin a theihna dingin thumni.

14. Kiginni:

Jesu Khrist sihna leh thohnawwna in Pathian tate hithei dinga hon bawl ziakin kipahthu genni.

Zingchiang thohnawwna program zalentaka zat ahihna dingin thumni.

15. Nipini:

Tuni Easter Sunday ni manpha tak chiat a, misiangthou mun teng a omte'n i zat chiat theihna dingin thumni. Khrist thohnawwna in khawvel a zohtak ziakin kipahthu genni.

16. Seppatni:

Zana kipanta ni 20 tan daihdng in North East E.U. missionary training camp Shillong ah om a Rev S Nengzakhup leng resource person khat ahi, thumna in phawkni.

17. Sepnawnni:

Tuni apan 20 tan EBC Hq. Church ah Discipleship camp om ding hi. Heutu tuam tuam in thugen ding, lohching taka zat ahihna dingin thumni.

18. Nilaini:

Ms. Manvung Pastor Lalkhogen tanu Bangalore a M.Div a zoh nungin tuin missionary training in omlel hi. Toupa makaihna leh ompihna ngenin thumsakni.

19. Ningani:

Convention Press a Manager Upa N Thawnzagin leh a seppihte adingin leh Press lam masawn zelna dingin thumni.

20. Sintawpni:

Mata khaw kianga D Leikot kichi khawthak liklek in hun tomchik sungin Mata khuate makaihna toh Biakinn lamzou pah uhi. Kipahthu genin thumna in phawkni.

21. Kiginni:

Tuni leh zingchiang in Evangelical Fellowship of India (EFI) Golden Jubilee lopna Lamka Manipur ah om ding. Lohching taka zat aihna dingin thumni.

22. Nipini:

Dorcas Society in project a neih uh "Jubilee Quarter" bawlina ding sum-le-pai Toupa'n honpiakna dingin leh Development nna phatuam theipena pat khiak theih a hihna dingin thumni.

23. Seppatni:

India phualpi a vaihawmte Prime Minister leh a khawnbawl pihte a dingin thumsak ni a manipur state a dingin leng thumni.

24. Sepnawnni:

Grace Bible College a semtute, lecturer leh guest lecturerte leh sintute tengteng banah graduate sa mun tuamtuam a nasema omte adingin thumsakni.

25. Nilaini:

Nepal Field a semtute, ginthak omzelte a dingin thumpihni. Government lam apan dalna leh

deihlouna uang deuhdeuh ding bang hi thumna in phawkni.

26. Ningani:

Manipur Field a semtute leh Khristian omte adingin thumsakni. Evan Chandrajini tuma a nau neih ziak a damlou a sawttak etkol ngai leng a hoih siang nadingin thumsakni.

27. Sintawpni:

Karbi Anglong Field a semtute leh a sepna mite uh a dingin thumsakni. Hatlouna tuam tuam laka Toupa makaihna ngenni.

28. Kiginni:

Tuni apan ni 30 tan Malaysia ah World Missions Condensed program om ding a Rev S Nengzakhup in tua mun ah hun zang ding hi. Thumna in phawkni.

29. Nipini:

Khanawn ni 3-5 sung Mimbung ah KTP Seminar om dinga, hiai hun ah resource ding leh participant dingin mun tuam tuam apan tampitak paikhawm ding hi. Thumna in phawkni.

30. Seppatni:

Tuni khabeini tan ahehpihna a hon pikai nawn tu Toupa kiangah kipahthu genni. Khathak leh hun thak a dingin kilanthak chiatni.

NAUPANG TOHLET

Hiai Mi Neute Laka Khat Leng A Manthat Ding Amah Deihlam Ahi Kei !

Naupang neuchik in temta hiamtak tawi henla, huai mu lechin bang na loh dia? Dil kiang ah naupang neuchik lau hetlou in kimawl henla, mu lechin bang na loh dia? Khawpi konglai Motor taina lamlian ah pilvang lou takin naupang neuchik om henla mu lechin bang na loh dia? Hiai tengteng ah naupang in amah a dinga lauhuai apan a bit theihna dingin a pilvang thei pichingte mohpuakna ahi.

Jesu'n naupang neute manthat ding a deih hetlouw laiin, setan in manthat theihna ding lampi tuamtuum bawl bawlin buai zenmah sek hi. Tulai khawvel a hong piangkha leh hong piang lai ding naupangte maituah ding tuh zulesa duhna, guktakna, damdawi khamtheih, hiamgamna leh manthat theihna chiteng toh ki maituah in om uhi. Bang loh ding ahia le! Huai teng laka vengbit theihna nang leh kei in i neih louh laiin, Jesu Khrist Khawvel Hondampa'n a nei hi. Khemnate dou zou dingin Jesu'n na naupangte a hihhat thei ahi. Jesu'n a manthat ding uh deihlou ahihman in naupangte Khrist kianga pi louh ngal i hihthei dang om lou hi.

Abiktak in, tulai naupangte khawvel khantouh dungzui in nidang lai naupangte sangin khemna leh hihse thei tampi tak toh hingkhawm uhi. Huai tuh setan in naupangte hihse tudinga a thil tup leh geel ahi. Marka 9:21-22 ah Jesu kianga naupang dawimat pau theilou a honpi uh i mu hi. Jesu'n hiai naupang haksatna kipat hun a dong hi, Naupang pa'n (*father*) adawng a "Aneu laia kipan ahita, amah hih manthat tum in tam veipi meikhuk khawng ah asawm puk ekek hi" achi. Mihing hinna hihse gawp dingin setan in naupang neuchik ahih apan matpah tup pipen a nei ahih dan i mu thei hi. naupangte mun lauhuai ah a ding gige ua, Bang i loh ding ua?

– Child Worker



**Lamka Christopher Sun
Crusade Hall Kongmai zawntak ahi**

